

上帝 ê 約

「主 koh 講：Chiah-ê 日以後，我 kah 以色列人 beh 立 ê 約是 án-ne：我 beh kā 我 ê 律法 khng tī in ê 頭腦，刻 tī in ê 心。我 beh 做 in ê 上帝，in beh 做我 ê 子民。」
 (《全民台語聖經》希伯來書 8：10)

咱 tiòh án 怎來分別現代 ê 契約 kah 上帝古早 ê 約 neh? Tāi 先，契約是兩個 á 是 koh khah chē ê 人做伙來走 chhōe 互相 ê 利益。In 研究狀況，談判，最後講：「咱已經達成一個協議。」契約通常是牽涉 tiòh 金錢、財產 á 是服務。

我最近 kā 一個教會 ê 會友買一塊十六英畝 ê 土地。她 beh 賣是為 tiòh 她 ê 利益，因為她需要錢，無需要土地；我 beh 買 mā 是為 tiòh 我 ê 利益，因為我想 beh 擴充我 ê 飼魚農場。另外，mā 是因為我 ê 老父以前 bat 持有 hit 塊土地，所以我想 beh 買一 koá tng 來。所以，Khe-loh-l (Carol) kah 我有簽一個契約，chit-má chit-ê 契約有登記 tī 法院。我有土地 ê 所有權狀，她有我 hō 她 ê 錢；一個合理 ê 錢額買一塊合理 ê 面積 ê 土地。當爭議發生，á 是一方違背契約 ê 時，律師就會來參與調解，然後由法院做判決；最後，法律會 kā phah 破契約 ê 人收罰款。

Chiah-ê kah 上帝 ê 約真無仝款。

亞伯拉罕並無 chhōe 上帝講：「咱來談判，立一個契約。」無，是上帝來到亞伯拉罕 hia，kā 伊講：「Chit-ê 是我必須 ài hō 你 ê。我看你是盡忠 ê koh 對我有信仰，所以 chit-má 我 beh hō 你特別 ê 地位 kah 特權。」Chit-ê 約 ê 成立是 óa 靠上帝信守祂 ê 應允 ê 能力，kah óa 靠亞伯拉罕 ê 信仰。

Óa 靠信仰，咱基督徒承接上帝 kah 亞伯拉罕所立 ê 約，mā 承接最後 ê 約，就是通過耶穌基督，咱 kah 上帝有一個親密 ê 關係。通過 chit-ê 約，上帝有應允咱永永遠遠 koh 豐盛 ê 活命。而且，上帝 bē 講白賊。

祈禱：上帝 ah，感謝祢 ê 恩典 kah 疼，kā 祢赦免 kah 和解 ê 約賞賜亞伯拉罕，mā 賞賜 hō 我。雖然 he 是免費 ê，而且我 mā bē-tàng 用 thàn ê 來得 tiòh chit-ê 賜福，m̄-koh，求祢 hō 我 tī 聖神 ê 幫助下，決心來忠實服事祢。我奉耶穌 ê 名祈禱。阿們。

(1994.06.05)